



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : f Tir Yimyim

Instagram tiryimyim@aolima

YouTube tir yimyim

TAPAK 3

Taoba Pakistan tir Pervez  
Musharraf süogo

BJP-i Karnataka assembly election  
nung takok angutsü: Arun Singh



VOL. XX NO. 115 (ADOK 115) DIMAPUR TENTONÜ (MONDAY) TSÜKLAI (FEBRUARY) 06, 2023 ₹ 5.00

## 14 NLA election atema ticket alemba manener

**Kohima, February 5, 2023 (TYO):** Nationalist Congress Party (NCP) aser Nationalist Congress Party (NCP) ajanga February 27 Nagaland elections atema candidate tem shimba osang metetdaksüogo.

NCP-i candidate 12 aser JDU-i candidate 8 nem party ticket agütsüba osang sangoktsüogo.

NCP-i shimteta candidate 12 tenüngtem rongnung NDPP-i ticket magütsür MLA 7 densema lir. Iba sangdong nung NCP Nagaland President Vanthungo Odyuo-i sign süa lir.

NCP ticket angurtem: Namri Nchang (Tening A/C), Zale Neikha (Southern Angami-II A/C), Amenba Yaden (Tuli A/C), Er Picto Shohe (Atoizu A/C), Pohwang Konyak (Phomching A/C), Muthingyuba Sangtam (Longkhim-Chare), Toyang Chang (Tuensang Sadar-I A/C), S. Toiho (Suruhoto A/C), Y. Mhonbemo Huntsoe (Wokha Town A/C), Y. Mankhao Konyak (Mon Town A/C), A. Pongshi Phom (Longleng A/C) aser Puthai Longon (Noklak A/C).

Külen, Janata Dal (United)-i sangdong ka nung Nagaland nung candidate 8 nem ticket agütsüba osang metetdaksü.

Iba shidi nung MLC, Bihar & General Secretary Afaque Ahmad Khan-i sign süa lir.

JDU ticket angurtem-Imsumongba Pongen (4-Ghaspani - I AC), Jwenga Jeb (12-Tseminyu), Vipopal Kintso (15-Southern Angami - I), J Lanu Longchar (30-Alongtaki), Senchumo Lotha (37-Tyui),

Geihwang Konyak (43-Tapi), N. Thongwang Konyak (46-Mon Town) aser Ajungli Sangtam (52-Longkhim Chare).

Republican Party of India (A)-i candidate 8 nem ticket agütsüogo, ta RPI(A) Nagaland State president Mughato Ayemi aser General Secretary Sentiwapang Longkumer nati sangdong ka nung metetdaksü.

RPI(A) ticket angurtem- Z. Kasheto Yeptho (5 Ghaspani), AR Loguseng Semp (12 Tseminyu), Wangka Konyak (47 Aboi), H. Nyemli Phom (49 Tamlu), Imtichoba Chang (54 Tuensang Sardar II), T. Yangseo Sangtam (60 Pungro-Kiphire), Lima Onen Chang (51 Noksen) aser Sethrichem Sangtam (52 Longkhim Chare).

Maneni, Deobarnü Congressia candidate 4 nem party ticket agütsüba osang metetdaksü.

Central Election Committee ajanga Nagaland assembly election atema candidate pezü shimogo ta General Secretary Incharge - CEC Mukul Wasnik-i sangdong ka nung ashi.

Congress ticket angurtemji Meshenlo Kath (9 Kohima Town), Alem Jongshi (27 Mokochung Town), Chenithung Humtsoe (40 Bhandari) aser P. Mulang (56 Noklak) nung lir.

North East Democratic Front indang president Limanuksung Lkr aser Secretary General (Org.) Michael A nati sangdong ka nung John Ovung-i 40 Bhandari nung tokteptsü atema party ticket agütsür ta osang metetdaksüogo.

## NPF-i candidate tarensen tanabuba metetdaksüogo

**Dimapur, February 5, 2023 (TYO):** Naga People's Front (NPF)-i Deobarnü Nagaland assembly elections atema candidate tenüng tarensen tanabuba metetdaksüogo.

NPF-i iba tarensen nung constituency 6 nung candidate shimba osang sangoktsüogo.

February 5, 2023 nü NPF President Dr. Shürhozelie Liezietsu-i ticket agütsürtemji 25-Mongoya nungi Moasangba Jamir, 28-Koridang nungi Major Toshikaba (Retd), 29-Jangpetkong nungi Imjongwati Longkumer, 35-Zunheboto nungi Akavi Sumi, 44-Phomching nungi Chingsak Konyak aser 58-Shamator-Chessore nungi H. Mukam nung lir.

"NPF ya Nagaland nung regional political party tejentiba lir aser onoki kechi südir süaka Naga

nunger kümzüksü atema noktaker ta Dr. Shürhozelie-i ashi.

"NPF party-i Assembly Constituency 60 prong nung metokteper aser iba atema tetsükdaksü ka ajurur. NPF party ticket meshir aika lir saka onoki tajungtiba shimteta agütsütsü lemtet" ta paisa metetdaksü.

"Naga nungeri tanü politics tamajungtiba ajurua lir aser iba nung sen ajanga nübortem anishir. Candidate aika sen nung alangogo" ta NPF Legislature Party leader Kuzholuzo Azo Nienu-i ashi.

NPF-i menden 60 prong nung candidate meyokaka election nung takok tajung angutsü, ta pai ashi.

"NPF ticket angurtem ya tasütaitertem rongnung tasütaitertem lir kechiyong sen

tashi anema takok angu. Naga lennir aika sen agi alizükterba oset ka akümiba atema sasa bilemstür. Lennirtemi sen yong mayoktsüla mesüra Naga loktiliba ya shishilembadak ka ama akümtsü aser asenoki asen temeten aser maitsü ayok tenzüksü" ta Azo-isa ayongzük.

Nomination file asüba anogo matongdang NPF-i ano candidate kar nem ticket agütsütsü akok ta Press Bureau, NPF-i sangdong ka nung metetdaksü.

"NPF Minority Wing President Bishnu Bhattacharjee-i Dimapur-1 Assembly Constituency (General Seat) nung tokteptsü atema ticket meshi saka pa ya temulung lemtetba party lennir ka asünung, pa nübo apayua pa dang election nung metokteptsü mepishir" ta Press Bureau-isa metetdaksü.

## AAP-i sen politics aser ochimashi agientsü ayongzük

**Kohima, February 5, 2023 (TYO):** Aam Aadmi Party (AAP)-i Nagaland nung alirtem dang sen tashi aser ochimashi politics merüktetsü asoshi yariteptsü ayongzükogo.

Deobarnü Hotel Crescent nung osangbener senden ka nung jembidang AAP North East incharge Rajesh Sharma-i "Nagaland nung politics ya sen aika amshiba inyakyim ka lir saka AAP-i iba politics meinyaker. Onoki temelenshi bener arunürtem aser ochimashi politics anema noktaker aginür" ta ashi.

AAP-i Nagaland assembly elections nung shilem agitsü. Candidate 14-i party ticket

meshiogo saka parnok aikati party indang criteria matonger, saka onoki February 7, 2023 tashi atatsü aser iba sülen official candidates sangdongtsü ta Sharma-i metetdaksü.

"Nübortemi temelenshi atema tejakeni arutsüla. Senotsü endoka election nung toktepa ajanga ochimashi inyakyim magientetsü kechiyong MLA kati election nung endokba sen den tetemlok tamasa bushitsü" ta paisa ashi.

"Asenoki tashishitsü maliba politics nüngdaker aser onoki item candidate bushir. AAP indang politics ya ochimashi politics asoshi temelen lir. Nagaland nung temelenshi aginüba lanurtem, tetsürtem aser nübortem onoki

aginür. Nagaland renloknür aser ochimashi agiennürtemi ozü party nung denang" ta Sharma-isa ayongzük.

AAP-i election tembangba sülen tanga party den tesentaktep mayutsü saka state nung temelenshi bener arunürtem aginür, ta paisa shisem.

AAP-i Nagaland state asoshi teimla aser mangdang tasen ka agütsünür, ta AAP Nagaland president Asu Keyho-ia ashi.

"Asenoki Delhi aser Punjab nung AAP ajanga inyakba nguogo aser Nagaland nunga yakta Kejriwal model of development angutsü imlar. Anungji nisung ajak party nung adentsü pelashishia agizük" ta paisa ashi.

## RSS den yariteper JDSSM-i ST list nung Khristantem agientsü akhanger

**Guwahati, February 5, 2023 (Agencies):** Khristantem teimba ser aliba Meghalaya aser Nagaland nung assembly elections agitsü aliba jakdang RSS-i nungitba telok kati tamangba yimsü melener lisopurtem Schedule Tribe (ST) nungi tenüng agientsü atema takhangba agütsür.

RSS-i nungitba telok ya Janajati Dharma- Sanskriti Suraksha Manch (JDSSM) lir.

JDSSM züngsem lakh 1 temai February 12, 2023 nü Janata Bhawan nung lungkak aitba sentong ka agitsü. Parnoki "Challo Dispur" programme kübok Centre aser state sorkartem dang Constitution of India nung Arla 342A yanglushitsü atema takhangba agütsütsü.

Parnokisa President Droupadi Murmu aser Prime Minister Narendra Modi na nem iba takhangba indang memorandum balala agütsütsü.

1960s mapang Congress MP Karthik Oraon-i iba onük mezüng jembia liasü. ST nungi tamangba

yimsü melenertemi 'reservation' tajangzük tuluba angur ta Oraon-i ashi aser iba atema 1968 nung joint parliamentary committee ka tenteta liasü, ta JDSSM-i ashi.

"Khristan aser Islam amala bendanger yimsü agizükertemi tajangzük anasü angur. Parnoki minority tenüng amer parnok tanurtem Khristan school tem nung züngdaksür saka STs indang scholarships, mapa aser tanga tajangzüktem agir" ta JDSSM, Assam Pranta co-convenor Binud Kumbang-i ashi. Parnokisa minister, MP, MLA aser autonomous bodies züngsemtem akümtsü atema elections nung shilem agir aser lisopur temetentem agiener, ta Kumbang-i ashi.

Parnoki March ita Parliament-i orr lungkak aittsü sentong lir ta paisa ashi.

"Khristan aser Islam yimsü agizükertemi STs nem agütsüba reservation aser tanga tajangzüktem mangutsüla. Saka parnoki tamangba yimsü melenba sülen tajangzük anaprong agir" ta Binud

Kumbang-i metetdaksü.

Kerala vs. Mohan ken o nung Supreme Court-i "kin ka nungi nisung kati pa tamangba yimsü melenra aser tanga yimsü ka amangra aser pa sobaliba, inyaksangshi aser külemküja toktsüra paji iba kin nisung ka mezüngshitsü" ta jangjajangja shiogo.

Anungji tanga yimsü amangba lisopur nem ST asoshi lenzüksüba temeten magütsütsüla ta Kumbang-isa ashi.

"Assam nung lisopur nütsüng yongsük lakh 40 shi nung 7-10% shi kati Khristan yimsü agizükogo. Dhemaji, Majuli, Sadiya, Golaghat, Karbi Anglong aser Dima Hasao nung lisopur aikati kuli aika atema Khristan yimsü agizükogo, aser tamangba yimsü melenba teimba akümer" ta JDSSM lennirisa ashi.

Onoki tamangba yimsü anema menokdaer saka onok oshi, sobaliba aser inyaksangshi kümzüka yunür, ta paisa shisem.

"Independence mangu nungi India nung ST nungertem asoshi

tamangba yimsü melenba ya lendong tulu ka lir. Lisopurtem Khristan aser Islam yimsütemi melenba ya tanü tasen masü saka tesüiba küm aika inyaka aruba mapa ka lir" ta JDSSM, Assam Pranta president Bagiram Boro-ia ashi.

"Lisopurtem Khristan, Islam amala bendanger tamangba yimsü dangi meyipba noktangtsü atema iba PAN-India telok ya tentetba lir. Onoki India nung lisopurtem sobaliba, inyaksangshi, külemküja aser oshitem kümzüka ayutsü. Onoki ST nung bendanger tamangba yimsü dangi meyipba noktangtsü aser ST nung asoshi janajagan tenzüksü. Guwahati nung onok indang Chalho Dispur sentong nung nisung lakh 1 tema adentsü" ta Boro-isa ashi.

"Iba takhangba ajanga Assam aser Northeast nung lisopurtem tashimait akümtsü" ta United People's Party Liberal (UPPL) MLA aser All Bodo Students Union (ABSU) nung taoba general secretary Lawrence

Islary-i ashi.

"ST list nung telok kar dang lir. Sorkari iba takhangba agizükra lisopurtem tashimait akümtsü. Talisa ST jenjang angutsü atema criteria 5 lir aser iba nung tamangba yimsü dena mali" ta paisa ashi.

"Constitution of India nung ST jenjang ya kin dak ajemdaker agütsür aser tamangba yimsü den sendaktepa mali" ta Assam Christian Forum (ACF) secretary Chowaram Daimary-i ashi.

"Bodo nungeri Bathouism benshia aru aser iba ya tematiba Tsüngrem (Obonglaoree) külemba lir. Ajisüaka Bodo nungeri Hinduism agi melenogo aser talisa ibaji Hoom Jaygya lir" ta Daimary-isa ashi.

"Anungji tamangba yimsü ana dang tetshiba ajanga pei tajangzük angutsü asoshi inyakba teloktemi Bodo nung tsüngda meputep adokdaksünüba sayur. Bodo Accord mapa küma tenzüksü lia parnoki mangatettep adokdaksünür" ta Daimary-isa metetdaksü.

# 22 Arkakong Constituency candidate Imnatiba, NDPP ticket meshitetba sentong



22 Arkakong Constituency candidate Imnatiba, NDPP ticket meshitetba sentong nung tangokba noksa angur

**Dimapur, Tsüklai/February 5 (TYO):** 22 Arkakong Constituency nungi 14th NLA election nung tokteptsü asoshi January 4, 2023 nü Changtongya Town nung Imnatiba, NDPP candidate asütsü sangdongba den NDPP ticket meshitetba sarasademba mapang agiogo. Iba sentong nung Imnatiba-i ashiba agi, NDPP tir Chingwang Konyak, NDPP Secretary General Abu Metha aser Chief Minister Neiphu Rio-i maongka agüja NDPP ticket temulung

lemteta agütsüba nungji constituency sanger kidanger yimtem Yaongyimsen, Kelingmen aser Unger nunger taoba mapang nongita adokdaksüba ama tanabena longjemmer pa nem ano maongka agüja taruba 14th NLA nungji ruling government nung mentettsü aser constituency tenzüksü asoshi teka amteper meranga yariteptsü pai nüburtem ayongzüka liasü. Iba sentong nung NDPP 22 Arkakong Constituency ir menden liasü, Changtongya

Village Council nungi pela agizükba mapang agi, Tayongzüka o NDPP Unit-Yaongyimsen, Akhoya, Unger, Nükshiyim, Liroyim, Changtongya Yimsen aser Changtongya Town nungi jemb. Ano iba den tajungshi O L. Yanger, Vice President, BJP Mokochung District aser NDPP, Mokochung region tir Bendang nati jemb. Rev. Temshi Pastor, CTBA ajanga sarasademja sentong tenzük aser Rev. Lipok, Pastor NCRC Changtongya Town ajanga sarasademja tembang.

# Manipur: VDF züngsem ka asüba Judicial Inquiry agitsü

**Imphal, Tsüklai/February 5 (Agencies):** Myanmar den arrtsü nung aliba Chandel district nung temesepba mozü anema raraba nung densema aliba Village Defense Force (VDF) züngsem ka tasü mang ngutetba sülen Manipur sorkari judicial inquiry ka tenzüksü telemtetba agiogo. Iba osang ya chief minister N Biren Singh-i Deobarnü Imphal East district kübok multipurpose hall ka semzüksüba mapang metetdakja liasü. VDF personnel Premananda asüba dak sendakba nung Honibarn aonung Chief minister indang office nung Joint Action Committee züngsemtem den senden ka amenba sülen iba osang ya metetdakja liasü. JAC-i, N Premananda parnok nem taküm meyipa agütsütsü khanga longkak aitba sentong balala ayongzüka agi

arudar. Sorkar aser JAC na tenangzüktepba yangluba nung, obendanger (retired) ka tekolak ser judicial inquiry ka agitsü aser ita asem tsüngda nung maparen tembanga inyaksü, Premananda kinungtsü nem mapa tapet agütsütsü, par tanurtem nem tenüngdakba teyari agütsütsü aser Premananda tenüng nung memorial complex ka yanglutsütsü densema lir. Par kibong ya Premananda kijai aayanga mesüa liasü. Manipur Police Department kübok VDF züngsem Ningombam Premananda, 37 indang sitoker aliba tasü mang ya Hokolbarnü Chandel district kübok Levenant tenemtsüng nung nguteta liasü. Pa, January 20 aser 21 aonung poppy naro raksaja aoba state police team nung den külemi inyaksangshiba mapang Urantop hill range nung

15-Assam Rifles camp nungi sama. JNIMS, Imphal-i tasü mang bener aruba sülen Deobarnü post-mortem agiogo. Tasü mang nguteta bener aruba mapang pa tasüba yimya meshidakba aser iba den pa indang mobile aser tsüngsem dena samara angiba nguteta liasü. Deobarnü Thoubal Okram nung gun salutes agütsüba sülen pa tasü mang ya par kinunger aser JAC züngsemtemi bener ao. JAC Jokinkumar Co-convenor-i ashiba agi, Manipur sorkari temesepba mozü anema rara ayongzüker raraba nung Premananda ya chichiba nokinketer ka liasü. Kasa mapang nung Thoubal District VDF Welfare Association-i ketdangsurtem dang VDF personnel tepsetertem takaratiba nung pua merenshitsu takhangba agütsüogo.

# Assam Rifles-i sentong balala ayongzüka agi



04.02.2023

**Dimapur, Tsüklai/February 5 (TYO):** HQ IGAR (North) tawabangba kübok Assam Rifles Shamator Battalion-i February 4 nü Shamator district kübok Shamator yimtsüng nung Cancer dak sendakba nung awareness lecture sentong ka ayongzüka agitsüba den angati agi azü tendangja liasü. World Cancer Day nüngdem

nung lanurtem nem Cancer tapu balala indang tangazükba agütsütsü atema Shamator Battalion-i cancer dak sendakba nung awareness lecture ka agüja liasü. CMO 14 Assam Rifles-i Cancer nungi jenboa alitsü atema jenjang tapet agitsü asoshi tangazükba agütsü. Kasa mapang nung Assam Rifles Jalukie Battalion-i,

February 4 nü Peren district kübok tesem balala nung Cancer dak sendakba nung awareness lecture sentong ayongzüka katsüogo. Sentong nung cancer adokdaksüba, temaitsü aser koda jenboa alitsü iba indang local tem nem tangazükba agüja liasü. Sentong nungsa temang nung timtem madoktsüsa taküm libaliro alitsü, mapangshia temang tendangtsü, temang arakzüa inyaksangshitsu aser chiyongtsü tapu balala liomedema achitsu atema tangazükba agütsü. Iba sentong nung yimdaklir 57-i shilem agia liasü aser parnok dang iba tashidak tendangba aser anepaluba yimya indang metetdakja liasü.

# Nagaland nung insurance drive atema Tata AIG General Insurance Co.Ltd shim

**Dimapur, Tsüklai/February 4 (TYO):** 2047 küm tashi nung "Insurance for all" nükla yur aliba atema State Insurance Plan benoka inyaksangshitsu asoshi Insurance Regulatory and Development Authority of India (IRDAI)-i insurance company tem shimogo. Nagaland nung insure mesüi aliba nüburtem nem insurance services agütsütsü aser maparen takaratiba nung inyakyonga aotsü atema IRDAI-i Tata AIG General Insurance Co. Ltd shimogo aser iba company ya tongit sür non-life insurance segment nung State Insurance Plan inyaksangshitsu. Tata AIG General Insurance Co. Ltd. den tanga insurer tem, IRDAI aser state sorkar nungi ketdangsurtem longjemmer state nung insurance coverage jenjang ajungkettsü atema inyakyim balala benoka inyaksangshitsu. Sentongtem rongnung insurance policies tem ajanga tajangzük agütsüba indang tangazükba agütsütsü, insurance distribution network akangshitsu, ken o balala

takaratiba nung bentettsü, MSME sector nung entrepreneurs tem nem teyari agütsütsüba aser lisopur ajaki insurance atutsüsa state nung protection gap tajemba kümdaktsütsüba densema lir. Tata AIG General Insurance Co. Ltd. MD aser CEO Neelesh Garg-i, Nagaland nung IRDAI State Insurance Plan benoka inyaksangshi tenzüksü atema tawa state semdangogo aser pai Chief Secretary aser Nagaland sorkar kübok ketdangsur tejentem den ajurutepogo. State Insurance Plan kübok Nagaland nung aliba nüburtem tajangzük angutsü alibatem rongnung, insurance dak sendaka aliba inyakyim balala ajanga mapang inyaksü asoshi maongka tali agütsütsü, health insurance agüja shirangba mapang teyari agütsütsü, insurance kübok MSMEs bendenloka state nung entrepreneurship ajungkettsü, gari tsükokba lendong nung densemertem atema compensation agütsütsü, lendong balala nungi nüburtem indang kiojen kümzüka toktsütsüba densema lir.

# Manipur nung sen lakh 18.72 alang kozü apu

**Imphal, Tsüklai/February 5 (Agencies):** Honibarnü Manipur kübok Senapati district nungi Dimapur-i sen lakh 18.72 shi alang kozü seret 2880 shibelener oya lia Assam Rifles-i puogo, ta official source kati ashi. Itangitertem nungi osang tejangja ka angazükba sülen Military Vehicle Camouflage Pattern (MVCP) kati Senapati district nungi Dimapur-i oya aliba pickup gari ana sot. Item osettem ya Myanmar nungi arrtsü adena Manipur-i shibelener arur, ta Assam Rifles-i ashi. Headquarters Inspector General of Assam Rifles (South) kübok Somsai Battalion-i ozüng alema tenokdangba agütsür aliba oset shibelena aliba puogo. MVCP ya Senapati district kübok Phaibung Khunao

yimtsüng nung amenoka toktsü. MVCP-i, temulung melemi bilemba pick-ups Bolero gari ana senzusenponga aliba aser nisung anati gari nung osettsüt inoka aliba angu. Kanga junga bushisüngdangba sülen kozü densema tenokdangba agütsür aliba tanga osettem nguteta liasü. Item osettem ayoktsü atema gari ana ya Dimapur-i oya liasü. Ajak senteper kozü seret 2880 apu koba shishilembadak sen lakh 18.72 asütsü. Sepaitemi apuba osettem ajak ya OC Pahibung Police Station, Senapati District nem bendanga agütsüogo aser ken o maneni bushisüngdangtsü, ta kasa sangdong ajanga metetdaktsü. January 12 nüa Manipur nung supari shibeleneritema puogo. Parnoki tata gari pongu nung sen lakh 66.30 alang kozü bener lia apu.

**GOVERNMENT OF INDIA**  
Ministry of Education  
(Department of School Education & Literacy)



**ADVERTISEMENT FOR THE POST OF JOINT DIRECTOR,  
CENTRAL INSTITUTE OF EDUCATIONAL TECHNOLOGY (CIET), NEW DELHI,  
NATIONAL COUNCIL OF EDUCATIONAL RESEARCH AND TRAINING (NCERT)**

National Council of Educational Research and Training (NCERT) indang constituent unit Central Institute of Educational Technology (CIET), New Delhi nung Joint Director mapa atema temsüa aliba nisungtem Applications/ Nominations atema jaoker. Iba atema itasen Rs. 1,44,200 - 2,18,200/- (Academic Level -14) (pre-revised Pay Band of Rs. 37,400 to 67,000/- (PB-4) with Academic Grade Pay Rs. 10,000/-) asütsü.

Appointment ya transfer on deputation mesüra tenure basis nung short-term contract atema asütsü koba küm pongu tashi mesüra candidate arishi küm 65 tashi mesüra pa/la parent organization nung superannuation küm tashi mesüra tetuyuba magütsü tashi koba tama südir iba dak ajemdaker jenjang agitsü. (Tatishitsu agi nisung ka pa/la parent organization nung mapa nungi anentsüba küm 65 dak tajemba süra aser iba nisungba ya Joint Director, CIET ama shimra, pa/la parent organization nung agüja aliba superannuation küm tonger mapa nungi anentsü). Eligibility aser tanga osang tejangja agitsü atema 11.02.2023 nü adokba Employment News nung advertisement adokba reprangdangang mesüra NCERT viz www.ncert.nic.in website semdangang.

Applications/ Nominations latetja aliba ama kanga junga renemer A4 size paper nung print sür Employment News nung advertisement agütsüba sülen anogo 30 tsüngda proper channel ajanga Ms. Anu Jain, Joint Director, Ministry of Education, Department of School Education & Literacy, Room No. - 100, D-Wing, Shastri Bhawan, New Delhi - 110 001, ket tongtsütsü nüngdaker.

**CBC21104/12/0024/2223**



February 05, 2023 nü Bengaluru nung G20 Energy Transition Working Group senden nung Union Parliamentary Affairs Minister Pralhad Joshi, Union Power Minister R.K. Singh, NITI Aayog züngsem V.K. Saraswat aser Power Secretary Alok Kumar nunger adenba noksa nung angur.

### India, France aser UAE linüktemi defence tsütsü amalitepa inyaksü

**New Delhi, Tsüklai/February 05 (Agencies):** India, France aser UAE linüktemi solar aser nuclear energy densema sector balala nung amalitepa inyaksü atema tesendaktep yangluba sangdongogo, ta ketdangsertem osang ka ajanga metetdaksü.

Linük asem tsüingda defence atema amalitepa inyakba tsütsü linük aseme külem sangdong ka ajanga, defence tsütsü maneni amalitepa inyakba jenjang ajungkettsü, longjemer defence terenlok atema inyaksü aser longjemer raraba oset yanglutsü; iba dak alia linük asem sepaitem maneni amalitepa inyaksü aser külemi training agitsü, ta metetdaksü.

India sorkari, linük asem nungi foreign minister temi phone ajanga jembidang item maparen atema asalentong yanglutsü telemtetba agiogo, ta

metetdaksü. "Phone ajanga jembiba mapang nung linük aseme energy tsütsü project balala nung amalitepa inyaksü atema sabang ajungkettsü, talisa solar aser nuclear energy nung rangloker inyakba den külemi climate change anema raratsü aser Indian Ocean Region nung biodiversity ajungkettsü atema inyaksü. Iba atemaji linük aseme Indian Ocean Rim Association (IORA) den külemi longjemer clean energy, environment aser biodiversity atema inyaksü asoshi jembitsü," ta Honibarnü linük aseme külem sangdong ka ajanga metetdaksü.

Alima nung yimchi-yimjung den tesünap alitsü aser azükaru alitsü nükjidong nung linük aseme item telemtetba ya agiogo.

Iba dak alia iba sabang ya sustainable projects atema linük asem tsüingda terenlok agency tem amalitepa inyaksü atema sabang ka asütsü.

"Iba denji külemi linük Paris Agreement nükjidongtem den külemi linük aseme rongsenketzung, technology aser loktiliba dak sendakba mapatong balala atema amalitepa inyaksü. Item mapatong atema India G20 Tir asüba mapang nung linük aseme sentong aika ayongzüka agitsü aser 2023 küm UAE nung COP-28 senden aliba mapang nunga linük asem jurila sentong agitsü.

Linük asemisa tashidak tasen balala ajanga tayongzükbatem koktettsü atema amalitepa inyaksü, ta kasa sangdong ajanga metetdaksü.

### Russia, China aser Pak-i SCO auditors senden nung shilem agitsü

**New Delhi, February 05 (Agencies):** Russia, China aser Pakistan densema linük 8-i February 6 nungi Lucknow nung ayongzüka Shanghai Cooperation Organisation (SCO) federal auditors' senden nung shilem agitsü, ta ketdangsertemi metetdaksü.

SCO züngsem linük 8 nungi tongti ketdangsertemi anogo asemnü senden nung shilem agitsü. Comptroller & Auditor General, Girish Chandra Murmu leniba nung agiba senden nungji cyber security, artificial intelligence aser auditors

teinyaksü shilem onüktem nung o lemteptsü. CAG, Girish Chandra Murmu leniba nung "Integrating Emerging Technologies in Audit" omen nung ajemdaker o lemteptsü. Tang India ya SCO Tir lir.

India nunger 2023 atema omen "Towards a Secure SCO" kübok India-i tanungba SCO züngsem linüktem nungi federal auditors den külemi inyaksü.

Iba senden dak sendakba nung CAG ketdangser kati, "SECURE tangatetbaji: 'S' ji sensotem security atema, 'E' ji

economic tsütsü terenlok, 'C' ji region nung connectivity, 'U' ji telongjem, 'R' ji nüchiso akhümtsübuba aser 'E' ji alima tzü-mopung kümzüka lir," ta metetdaksü.

Region nung China, Russia, Kazakhstan, Kyrgyzstan, Tajikistan aser Uzbekistan linüktem tsüingda amalitepa inyaksü atema 2001 küm Shanghai nung China aser Russia nati SCO ya tenteta liasü; 2005 küm India nem 'observer' jenjang agitsü aser 2017 küm nungbo India-a SCO züngsem aküm.



February 05, 2023 nü Lucknow nung All India Muslim Personal Law Board (AIMPLB) executive board senden nung AIMPLB Tir, Rabey Hasani Nadwi, AIMPLB General Secretary Maulana Khalid Saifullah Rahmani aser tangartem adenba noksa nung angur.

### Lokti tentetemi küm piyong BJP anema nübo ayongdentsü

**New Delhi, February 05 (Agencies):** Tawa tembangba 'Bharat Jodo Yatra' ya takok ngua katetogo, ta shia lokti tentet balala aikati 2024 küm RSS-BJP anema nokdaksü atema longjemer inyaksü sentong yangludar.

Iba campaign ayongzüka ya mapa manguba anema longkak aiterem, sorkari ali agiba anema longkak aiterem aser rongsenketzung jenjang majungba atema longkak aiterem sabang ka nung külemi longjemdaksütsü aser RSS-BJP anema tongtepratep network yanglutsü atema lir.

Iba campaign lenirtemi ashiba agi, organisation balalai iba campaign nung adentsü akok aser Congress Party lenir, Rahul Gandhi-i mepishiba nung ajemdaker Kanyakumari nungi Kashmir tashi Bharat Jodo Yatra pusema shilem agirtemia iba campaign nung adentsü akok.

Item pezü tsüingda Bharat Jodo Yatra ajanga state 12 ayimjema liasü, aser iba mapang

nungji telok balalai yatra pusema shilem agia liasü.

"Iba ya Yatra ajanga a y o n g m e s o b a meremsepdaksü maneni yangertsü atema lir," ta campaign tayonger kati metetdaksü.

Lokti tentet balala aser yimtenren tsüingda amalitepa inyaksü atema Hombarnü New Delhi nung ayongzüka senden nung adentsü atema yimtenren party tema jaokogo.

Iba senden nungji Congress, NCP, RJD, CPI, DMK, JDU, CPM aser RLD party tem nungi lenirtema adentsü; Samajwadi Party nem-a tejaokba shidi agütsüogo.

Bharat Jodo Yatra agitsü apiteter Congress lenir ana-Rahul Gandhi aser Digvijaya Singh nata iba senden nungji adentsü imlar.

Lokti tentetemi BJP anema küm piyong campaign agiba mapang nung yimtsüing level nungi booth level tashi ayimjemtsü, ta campaign ayonger kati metetdaksü.



Doda, February 05, 2023: Jammu & Kashmir kübok Doda district nung ali anenoka ia ki raksaba ajanga takoksa angurtemi kidang nungi osettsüset belenba noksa nung angur.

### BJP-i Karnataka assembly election nung takok angutsü: Arun Singh

**New Delhi, February 05 (Agencies):** Karnataka kübok Old Mysore region nungi lenirtema sorkar nung aniokba, Chief Minister Basavraj Bommai leniba nung sorkari terenlok mapa inyakba aser central schemes ajanga BJP-i taruba Karnataka assembly elections nung taoba mapang dang nungi tang menden teimba ngua takok angutsü imlar.

Karnataka nung assembly election agitsü atema taruba hopta ishika tsüingda Election Commission-i anogotem sangdongtsü imlar.

BJP-i assembly menden 224 nungi menden 150 nungbosa takok angutsü nükjidong nung state tesem ajaklen voters ayongdenba campaign "Vijay Sankalp Abhiyan" tenzüko.

Tawa BJP National Tir, JP Nadda-i campaign tenzüksüba sülen Union Home Minister Amit Shah leniba nung party lenirtemi Dharwad-Hubli region nung roadshow agiogo.

BJP general secretary (in-charge of Karnataka) aser Rajya Sabha MP, Arun Singh-i, "Centre aser state naprongla nung sorkar- Gol ana aketba sorkari terenlok mapa balala inyakba ajanga state nung azükaru bener arutsüogo. Gol ana aketba yimsütsüba atema onoki maneni mera agia inyaksü aser iba atemaji BJP-i

two-third majority angutsüla," ta ashi.

Singh-isa, "2021-22 kümsük nung GST saru teimba bendentetba state ji Karnataka liasü aser Start-up category nunga temaba jenjang nung lir. State nüburtemi maneni BJP nem vote agütsütsü, ta onoki amanger," ta metetdaksü.

PM Garib Kalyan Yojana kübok angati ration maneni agütsüba den külemi state sorkari Raitha Vidya Nidhi Scholarship Scheme kübok kaketshir lakh 10 nem scholarships sen crore 440 shi agütsüogo, ta Singh-i metetdaksü.

North aser central Karnataka nung party jenjang junga lir aser South Mysore den Kalyana-Karnataka regions nunga party jenjang tajungba akümtsü atema meranga inyakdar.

"South Mysore region nungi züngsemtem sorkar nung aniokogo, ibayongji minister temi kanga meranga inyak aser South Mysore region nunga party junga amenokdar," ta pai ashi.

Karnataka sorkar nung South Mysore region nungi minister temji K Sudhakar, ST Somashekhar, KC Narayan Gowda, Manirathna Naidu, MTB Nagraj aser K Gopalaiah nunger lir.



## TIR YIMYIM YIMOBILEM (EDITORIAL)

DIMAPUR TENTONÜ, TSÜKLAI (FEBRUARY) 06, 2022

### Election temerükba agia aotsü imlar

Joko, asenoka tangatetba nung tainba aser tajungba akümer asünungji, taküm küm nungi election ya temerükba aser tajungba agia aotsü imlar. Aji oda, asen Ao lima nung dang masü saka talisa Chakhesang, Angami aser Sumi nung alidak tesem ajak nung lokti tentet aser arogoi senso shia dang election nung senyong vote malitsü aser mayoktsü asoshi tangatetba dang masü, joko, ozünga dena agütsüba asenoki angur. Tang tashi nung asenoki asen lima ya topur junga yangluner aser asenoka pei yari mapa inyaka akümketa linür saka meliteter ta asüba timtem ajak ya election nungi tenzüker. Asen lima election nung sen agidang asayar asünung, lokti aser yimten tia meteta tenzüknüba nisung mesüra tashitemetet akaba yimten nisung mesüra alima meimba shisatsü aketba lanurtem masü saka takartemang election-i iteter. Ibayongji, asen lima nungbo takartemang yimsüsür künftetter aser yimsüsürtemang takar akümer. Iba jagi tilar aser sensakertem taküm tia tamajungba akümer. Aji oda, tang tashibo asen lima nung election agiba ya nübortem anepalutsü atema yimten tashi, maongka aser khuret raktepba mapa ka masü saka sen akartem sen endokdak maka mapang endoka nübortem mesüshiba asayaba asaya ka asayar amai dang lir. Iba ama election agi sen asayaba 'game' ka dang aküm nungji, yimten nung shilem agia nübortem tenzüknüka sen makara election nung metokteptetba lanurtem aika lir. Alima yimya agi takartemji taintemang asür, kechiyong asen lima nungbo tsürabur meyong senmang amangba rongsen agi takar akümba lanur aikabo mali, anungji shiba südir sang, peisasa pei inyakba agi takar aküm tenzüksüba dang lir. Aji oda, tang ama election mapang nung lokti aser arogo lenirtemi nübortem dang election nung toktepertem rongnung Tsüngrem metetba aser nübör meimba aser tashi temetet akaba nisung shimang ta ashiyonga, election nung toktepertem rongnung iba ama taginütsü nisungji melira koda asütsü (?) ta asüba timtem nübortem ajurur. Tanü nübortem ajuruba timtemji aji lir. Aji oda, iba timtemji kokteta takar masüyonga Election ozüngi latetba sen lakh ishikabo endoka lanur tajung tetemsü karbo election-i itettsüsa taküm agiba election nungi temelenshi tajung ka tenzüksü imlar. Atangji, yimten nung nübortem tenzüksüba tangar kidang chiso akaba nisung katibo metenzüktsü, anungji election-i aiba nisungji, shiba südirüka, peisasa pei taküm aser kibong repringtetba nisungbosa asütsüla. Iba tangatetba nung lanurtemi meranga inyaksüla aser nübortemia yimten tenzüksü sempet alir lanurtembo ajungshia aser yaritepa election-i yoktsüla. Atangji, tangar lima nungbo election nung toktepsang candidate aser par party asoshi temulunger tenla bendentsür aser iba senji election nung magima anünger. Asen lima nunga yamala election yimya ka tenzüksüba menua maka aser tasaka masü. Nisunger yimya asünungji, takok toktepdang, tetoktepertemibo o tanang agi mesüzüksü, sen agi alitsü merangtsü aser tashiyim agia akoktsü merangtsü. Ajisüaka, election ya candidate akaba aser tashi sayuba mapang masü saka nübortem tangatetba aser tashi sayuba mapang lir. Ibaji kodang angatetdir, nübortem tangatetbaji sen agia mesüra tashiyim agia makoktsü. Taküm election nung nübortem iba tashiji sayutettsü imlar. Atangji, alima asünungji nisungi inyakba mapaji kenyongi temeshi aser temerükbo masütsü saka asenoki inyakba mapaji moijingii inyakba mapa amatobo masütsüla. Asenoki election shitak aginüba agi, 'Clean Election' yimyim ayima inyaker saka taginüba ama takok mangudang menütsür mesüra tezü atanger, ajisüaka joko asen lima nunga election merüka agitettsüsa nübortem teimba ka dak tangatetba aliba repringteter. Asenoki Tsüngrem dak amanger saka Laishiba sayuba ama meliteter, ajisüaka iba jagi asenok tamanger masü akümtsüa masü aser Laishiba azünga aser bushiba anentsüsa masü. Kasaji, election merüka agitsü asoshi asenoki merangba mapa ya lir. Tanübo tebilemba ama election merüka magitettsü akok, iba jagi 'Clean Election' yimyim anentsü ta masü. Election jungjunga merüka magitet tashi 'Clean Election' yimyim ya tesashiba ayimtsüla. Aji oda, 'Clean Election' yimyim ya komaka sashia ayimdir patekaji Election shitak merüka agitettsü. Ibaji taküm election nungi tenzüksü imlar.

## OLEMSABANG

### ASEMTEPBAJI TEKARAR ASOSHI MASÜ ASER TONGPANGJI TASHITAITER ASOSHI MASÜ

~ L. Kika Pongener.

Tang asenok aliba putu ya lenla ajak nung tetoktepba agi sunga aliba putu ka lir. Atangji lenla ajak nung tajungtiba asutsü toktepba putu ka nung asenok alir. Sorkar bangdak yimsusuba menden nung mener yimsu asutsü atema Election-i yir adoker tatar akümtsü tokteper, sorkar tenzüka mapa nung menden temaba jenjang nung mener tenzüksü atema UPSC/NPSC/NSSB amala Exam nung takok angutsü tokteper. Ano kakat shisatsü bushiba luyim nung temaba Degree angutsü atema toktepa azünger, saisapong nung Metal angutsü atema toktepa asayar. Atangji item tetoktepba ajak nungji shirnoki nendak-nendaka, temulung agüja meranga inyaker, meranga asayar aser meranga bushir parnok den Tsüngrem adener aser alizüng tongteta takok angur. Tsüngrem o-i ashir, "Asemtepbaji tekarar asoshi masü, tongpangji tashitaiter asoshi masü, mesüra chiyungtsüji shisa akar asoshi masü, mesüra rongsenji tekolok chirar asoshi masü, mesüra akümstüsubaji tesangrar asoshi masü; Saka mapang aser tia parnok ajak dak ataloker. Kechiyong nisungi pa mapanga memetet" (Sayu-9:11-12). Atangji asenok nisunger shisatsü agi bilemstübo asemtepbaji tekarartemi dang takok angutsü aser tongpang rarajia tashitaitertemi dang takok angutsü. Ajisuaka, Tsüngrem o-i ashibaji nisungi kechi kodakirnaka merangaka Tsüngrem teyari medenra amajok ta ashir. Ano asenok nisunger libaliro yimya nungbo takok angutsü atemaji rongsen, nubu, shisatsü peria lirapang teperi ta ashitsü akok, hau aji-a nunga ta meshili, saka takok angutsü atema iba kisung jagi dangbo teperi masütsü. Iba denji ano bendanga agüja nendak-nendaka meranga inyaksüla aser Tsüngrem tama sudaktsütsüla. Atangji, Tsüngrem teyari medenra mapa kecha nunga takok mangutsü, aser kodakirnaka sür takok anguyongjia amajok asutsü aser arishia nokdaka malitsü.

Asenok nisunger shisatsü agi sangrasangjia lenmang kar nungbo takok angutsü akok, ano nutsüng nubu tashi agi, mesüra rongsen/supokrem agi alizüker takok angutsü akok, tiyazü küli agi takok angutsü akok, mesüra tashiyim agi amokmerena takok angutsü akok, saka iba ama takok angubajibo mapang talangkabo nokdaka malitsü kopi meli-i laoadoktsü. Ano item dak alaka, sai-sapong nung Team kanga tajungbo masü sernung tim masüba yimya benshia (Rough) agi asayaa takok angutsü akok. Ano mapang kar nungbo Team anaprongla tashi kasa dang sur kanga dang toktepa asayaa lia, Referee-i tim mesüi tip külen tepo akümba (Partiality) ajanga Team kati takok angutsü akok. Ano kakat shisatsü shisaliok bushiba luyim nunga kaketshir karbo Exam Hall-i kakat bener orr aueyaa zülua (Unfair-means) takok angutsü akok, mesüra ano kaketshir karbo kheni meshimeshia mazüng sur sen dalang agi 'Degree Certificate' alizüksü akok. Ajisuaka, iba ama mashilen lenmang (Back-door) nungi takok angubaji pei sasa pei ashioksür dang asutsü aser alima nubur asoshi tagitsü nubu ka masütsü. Tsüngrem o-i ashibaji kanga dang shidak lir, "Asemtepbaji tekarar asoshi masü, tongpangji tashi-taiter asoshi masü, mesüra chiyungtsüji shisa akar asoshi masü, mesüra rongsenji tekolok chirar asoshi masü, mesüra akümstüsubaji tesangrar asoshi masü; Saka mapang aser tia parnok ajak dak ataloker". Tetezü...lenla ajanga nung takok angutsüba nisunger tashi agi merangba kisung agi masü, saka tensa mapang aser tia den külemi Tsüngrem teyari aden nung dang takok angutsü ta ashir. "Korji raraba anogo asoshi renema lir, saka takokji Kibuba meyong" (A. Shin-21:31). Shiruru rongnung Kor ya rara nung amshitsü hadir tajung ka lir, Gari sadema motetdak lenmang tamajung nung prangpong, injang, bomb, nungdakba osettsüset aser sepoytem ajak Kor yagi belener. Atangji Korji raraba anogo nung amshitsü atema tashitait nutsüng aika renema yua liaka, saka takok angutsüba jibo Tsüngrem ket nung dang lir ta Tsüngrem o jagi ashir.

Anogo ishika tsüngda nung asen Naga lima nung General Election agitsü renemshidagi, iba Election nung Candidate/Party ajaki adoktsü kanga imlaseta renemshidagi. Ano Candidate/Party karibo sen agi alizüker takok angutsü sendong atonga alitsü sudi. Ano Candidate/Party karibo tashiyim amshia polling station Coup sur takok angutsü sentong atonga alitsü akok. Aji oda, Candidate/Party ajaki lenmang balala, yimya balala, tasa balala agi takok angutsü merangtepa alitsü. Ano Candidate/Party karibo tiyazü olulu (Propaganda) agi nübör mangmandaktsür aser tashiyim, rongsen/supokrem agi alizüker takok anngutsü merangtsü akok. Tesasatsüka, tanü asen lima nung sorkar bangdak nungi shir yimtsüng tilatiba bangdak tashi nung Election nung tim lenmang nungi masü, saka mashilen lenmang nungi takok angutsü merangtepa agi nubur tsüngda nung mepet-mesu aser telemsa tali adoker. Anungji takok nguogo ta asubaji tongtipangba masü, saka iba takok angubaji nubur aser lokti asoshi tajangzük asu masü (?)...ibajiang kanga agi tongtipangba lir. Mimchir tashi aser sangrasangji agi takok angubajibo ashiko kenu anogobo timtem tetsükdaktsü arulanglang. Tsüngrem o-i ashir, "Parnoki chubatem shim, saka aji ni nungi masü; parnoki tongtipur shim, saka aji ni memetet" (Hosea-8:4). Asenoki asen lima lenitsü chubatem shimdang, Tsüngremi shimba chubatem metettsü meranga shimdi. Tia mekai-ka Tsüngremi memulungba chuba kar shimshia atara koda tesasatsüka asutsü. Tsüngremi meshimtetba chubatem yimsu sura asen lima kodanga tejakleni maotsü aser merenloktsü. Atangji, Tsüngremi meshimtetba chubatem shimtetra nubur meyong rongsen aueyaa chimatsü saka terenlokbo makatsü. Anungji tang aruyaa Election nungbo asenoki lumia sarasadema Tsüngrem dang asungdanga asen Naga lima anitsü chubatem shimtsü ayongzüker.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

# KLB Arogo D. Block nung Youth Pastor tasen aniokba sentong agi



February 05, 2023 nü Kohima Liangmai Baptist Church D. Block nung Kr. Kungkam Newmai Youth Pastor installation sentong nung tangokba noksa nung angur.

**Kohima, February 05 (TYO):** February 05, 2023 nü Kohima Liangmai Baptist Church D. Block-i Kr. Kungkam Newmai Youth Pastor aniokba sentong ayongzüka agiogo.

"Tenzüksü atema tajaba" omen nung ajemdaker iba sentong agia liasü.

Kohima Liangmai Baptist Church Pastor, Rev. N Silubo Zeliang-i ketdangsüa Youth

Pastor tasen agizükba sentong agidang Rev. N.Silubo-i Kungkam Newmai dang, Tsüngrem dak tamang akatsü aser tajungtiba agi Kibuba tenzüksüa ayongzüük.

Rev. N. Silubo-isa Youth Pastor dang lai agizükba khuret tajungtiba nung abentsü aser lanurtem ajungmesoa la tajungtiba agi Tsüngrem tenzüksü ayongzüük.

Kibuba tenzüka ministry

mapa atema Dr. Zaiwang aser Malumlung Zeliang nati Arogo nung youth Pastor sponsor asür.

Kasa sentong nung jembidang Kungkam-ia Arogoi la dak tamang katetba aser Kibuba tenzüksü atema la nem maangka agütsüba atema Arogo dang pelaba lemsatepba den külemi lai la tajungtiba agi Tsüngrem tenzüksü, ta nangzüka liasü.

# Ukraine nung Tenla ki aser temeshi tesem 500 shi raksatsüogo

**February 05, 2023:** Russia nung Evangelical Khristanem anema inyaker; küm ka shi tejaklen Russia-i Ukraine amak tenzüka sülen Russia nung sepaitemi Arogo kiojen, theological institutions aser temeshi tesem 494 shi raksatsüogo aser kar nungbo auyaogo, ta Kyiv yimti nung amenoka aliba Institute for Religious Freedom (IRF)-i metetdaksü.

Taoba hopta Washington D.C nung tasenbuba International Religious Freedom senden aliba mapang nung Institute for Religious Freedom-i iba osang metetdakja liasü.

IRF-i Ukraine nung Russia-i rara mapang tamangba yimsü anema ozüing alema inyakba mapatem osang tejangja bendentsü meranger.

Russia nung sepaitemi tamangba yimsü dak sendakba temeshi tesemtem ya teimbaka metetsümonga raksatsür; parnokisa Khristanem aser pastor tem anema inyaker, ta IRF executive director, Maksym Vasin-i metetdaksü.

Russia nung sepaitemi Ukraine nung Khristanem ya America nung atema itdangitertem, telemsa adokdaksürtem aser Russian Orthodox Arogo atema tsükchirtem lir, ta tai tonglokja Ukraine nung Evangelical Khristanem anema inyaker, ta

Kherson nung aliba Tavrisi Christian Institute nung rector, Valentyn Siniy-i metetdaksü. Russia nung sepaitemi seminary indang kiojenji headquarters ama amshiba sülen auyar raksatsü, ta paisa metetdaksü.

"Russia nung sepa ketdangser katibo ozü institute nung inyaker ka dang 'na ama evangelical tamangertem ya meshimeshia samatsütsü nüngdak. Injang khaloktsüba ajanga nü taküm melamela tembangtsü, anungji nenok ya metepseti ali nung aremtsü nüngdak' ta shia liasü," ta Valentyn Siniy-isa metetdaksü.

IRF report ajanga, Russia sepaitemi Ukraine nung evangelical church prayer house aika raksatsüogo, evangelicals indang temeshi tesem 170 raksatsüogo, aser item rongnung Pentecostal Tenla ki 75, Baptist Arogo Tenla ki 49, Seventh-day Adventist Tenla ki 24 aser tanga evangelical Tenla ki 22 raksatsüba densema lir, ta metetdaksü.

Ukraine nung nütsüing shilem 5 shi dang Evangelical Khristanem lir aser Orthodox Khristanbo nütsüing shilem 80 shi lir. Orthodox Arogo kiojena 143 shi raksatsüogo.

Orthodox Church of Ukraine (OCU) indang kiojen 34 raksatsüogo. UOC indang Tenla ki 300 shi raksatsü aser item rongnung 75 bo

meshimeshia raksatsü.

IRF-isa, Jehovah's Witness indang Tenla ki 94 raksatsü, Catholic Tenla ki 29, Yihuda nung tekülem ki 12, Muslim nung tekülem ki 8 aser Mormon religious sites 4 raksatsüogo, ta metetdaksü.

IRF-isa, ano maneni rara mapang nung eastern aser southern Ukraine nung temeshi tesemtem aika raksatsütsüa akok, ta metetdaksü.

IRF report ajangasa, shells aser missile amshia amakba, temeshi tesemtem nungi auyaba aser yimsü lenirtem reshikangshia tepsetba osang bendendar.

Russia nung sepaitemi Tenla kitem raksatsüba dang masü saka Ukraine nung oshi nung Laishiba densema Khristan kaketterem aika rondoktsüogo.

IRF-i bendenba kuli balala ajanga International Criminal Court ama International tentet balalai itemji bushisüingdangtsü aser Russia ketdangsertem anema inyaksü atema ajungmesotsü imlar, ta IRF executive director, Maksym Vasin-isa metetdaksü.

IRF report nungsa Ukraine kübok Bucha, Irpin, Mariupol aser Kharkiv yimitem nung teraksatsübatem ajanga Russia-i item yimti ajak meshimeshia samatsütsü nükjidong nung inyakba kuli angur, ta metetdaksü.

# ANOGO ABEN TSÜNGREM DEN

## TASAK SAKA TAKOKTSÜ

"Temeshi pur asütsü ajaba"- Rom 1:7.

Temeshi pur asütsü ajaba nung asenoki tematiba sentsüwangshi dang angur masü, saka tasaktibaa angur. Asenoki shidakba tajung akümtsü memerang tashi asenok kodaka majung agi memetetsü. Asenoki shidakba tenla agütsütsü mangatet tashi asenok koda ka merumeru asenoki mangatetsü. Asenok tajung inyaksü memerang tashi asenok majungbatem mangatetsü. Asenoki temeshi alitsü memerang tashi asenok temenen nisung ta mangatetsü. Aji saka: "Temeshi pur asütsü" ajabaji lir.

Sermon agütsütsü temela, zülutsü temela, ken mejemtsü a temela, telok anishitsü temela, yimsü mapa nung tongtipang shilem agitsüa temela, mapa agi sayua temeshi pur asütsü tasaktiba lir.

Khristan yimsüi tama mapa masü, jakla repranger. Asenok "temeshi pur" asütsü aja. Aji asenoki langka "meinyakdang" "langka" asütsü ajaba. Iba nung teti sotta alitsüa menügdak. Asenok jakla agi masü, Khrista jakla agi asenok kümzük. Temeshiba akümtsüba mapa nungji Khrista jaklaji kü jakla akümtsüla aser Tsüngrem tsüngdang obendangba tsütsü nung ni Khrista nung tenokdaktak tasen ka nung noktaker. Saka kodang ni temenen maketba jakla aser Kümtetdaka Khristai kümzüker ni jakla yanglushir. Kü shilem bendanga agütsüba, aser Pa mapa ajanga kü jakla Pa jakla ama akümer. Asenok mapa agi mekümzük, saka Tsüngrem shilem pa taochi, aser asenok shilem tamang ajanga kümzük; aji saka mapa tajung meteni asenok kümzüksü makok, kechiaser Yakob 2:17 nung Yakobi ashir, "Tamang meteni mapaji tasü"- tamang tasüji tamang masü.

Kilitsür kati ashi, "Ni temulung memeyipdang atem nung alemba sü tema dang aok, ni temulung meyiper iba telunglenjia aoker." Pastor kati asangur sepoy ka dang asüngdang, "Ner kibong nung Khristan akümer shinga mali asü?" Sepoy jagi langzü, "Au, kübu lir." "Nübu Khrista dangi temulung meyipba jagi kibong nung tepila lir asü?" "Au" ta sepoy jagi langzü, "iba jagi kibong nung onok ajak timtemdaksür." Tebui shidakba temeshi pur noksaji mesayuba sayur. Terunemji teshinem mekümduksüi iba jagi ki süngdaksütsüla. Temeshi pur asütsü asoshi telemtetba takang, saka temeim aser mapa nung tajinütsü keta inyaksüla.

Asenok temeshi pur akümtsü takoktsü kümdaksüba asoshi Tsüngrem tenüing sangdi. Tsüngremi ayonzükba ajakji tenangzükbatem lir. Pa ozüngtem ajak takoktsü lir. Ni yamaji asütsü ta mulungtetra, yamaji alitsü. Aser Pa kü mulung nung aliba ajanga Kibubai aji oda inyaksü. Temeshi taküm ka alitsü temerang; temeshi minute ka alitsü merangang ! Item rokerji temeshi ghonda ka yanglusang, aser ghondatemi anogotem, hoptatem, kümtem yanglur. Minuteji ne meyong. Aji Pa asoshi liang, bilemdang, jangraang, jembidang. Ibaji takoktsü. Khrista ne dak lir. Pa nem agüjang. Pa amangang, Pa tendangang.

# Arogo lenirtemi South Sudan nung yimjung atema ayongzüük

**February 05, 2023:** Pope Francis, Archbishop of Canterbury, Justin Welby aser Moderator of the Church of Scotland General Assembly, Dr Iain Greenshields nungeri South Sudan linük nung lenirtem dang linük nung rara nokdangtsü ayongzüük.

South Sudan Tir, Salva Kiir Mayardit-i jaokba nung ajemdaker Arogo nung tongti lenir aseme iba linük Amongnü tashi semdanga liasü.

Linük yimtiba, Juba nung Pope Francis-i lenirtem dang, yimjung atema inyakba maparen tejakleni maoer ama reprangteter, ta shia pai lenirtem dang rarabaji tesülen toktsür yimjung anogo tasen ka tenzüakang, ta ayongzüük.

"Nüburtemi ayimdenba ola angashia onoki yimjung atema temeshi ainlen jajar. Tanü nenoki inyakba mapatem nungji ajemdaker tarutsü putui nenok tenüing akhümtsüba bilemtetsü mesüra nenok nüng amadoktsü," ta Pope-i ashi.

Archbishop Justin Welby-i, "South Sudan nungertem rara ajanga kanga ani belemogo, ajisüaka yimjungji anasa lir. 2019 küm nenoki nangzükbatem bilemtetdang kü melung shiranger, kechiyong ano maneni rara osang angashir. Yimjung atema tezüngzüktep agiba nungji asenoki shilem kar dang inyaksü makok saka tezüngzüktep nung aliba shilem ajakji mapa küma inyaksüla," ta ayongzüük.

"Yimjungji nenoki atongtsüsa kanga ana nung lir, anungji nenoki Tsüngrem teyari agia yimjung angutsü akok," ta paisa shisem.

Iain Greenshields-i, "Alimai taochi aliba Arogo aser lenirtem nüngdaker. Item ajanga yimjung yanglur," ta ashi.

2011 küm South Sudan-i nüchiso ngua liasü saka tesüiba küm 13 tashi linük nung civil war ajanga nisung 400,000 dak tema süogo aser nisung million 2 dak tema linük tesem balala nung jenshia lir.

AO OSHI ANGAZÜKDAK:

TANÜ ANGAZÜKTSÜBA OJANG



Osettsüset

(n) oset tapu balalatem (materials)
\*Ki yangludang osettsüset aika nungdaker.

Osetyangdak

(n) oset tapu balala yangludak (industry)
\*Asen lima nung osetyangdak tulu kata lapoka mali.

OLONG PAITEP # 6420

Grid for crossword puzzle #6420 with numbered squares.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S \_ \_ \_ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong talemangliba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 6419 TELANGZÜBA

TIPIEN :

- 2. Bangsemo, 6. Tiptem,
8. Jen, 9. Talila, 11. Aren,
12. Tzübo, 14. Alia, 16. Angati,
17. Odi, 18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
5. Milen, 7. Tulu, 10. Laza,
11. Aben, 12. Tiyong, 13. Ajizük,
14. Aitsü, 15. Tasa, 16. Aina.



CANDIDATE ALOKBA MANGMANGER :

Sobangba : Temba, na tejenba teinyakdak party ticket maguata angashira, koda koba party nung atener?

Alokba : Aeet, anogo ana asem ya onok candidates ajak tu küleni odangli, arudangli ta pakzütepba taonungang party ka nung tena ticketbo agizükogo saka party onsaraba agi koba party nungi ticket agizükar ni puzzle nung lirji asüngnep newspaper tem nungi jangjaang no?

~ Lilir : WhatsApp



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng : .....
2. Tasoba anogo: .....
3. Küm : ..... 4. Class : .....
5. School : .....
6. Talidak : .....
7. Salem osang : .....

Tipra Motha-i election magidang tesentaktep mayutsü: Pradyot Manikya

Agartala, February 5, 2023

(Agencies): Tipra Motha-i election magidang political party kecha dena tesentaktep mayutsü ta Chairman Pradyot Kishore Manikya Debbarma-ashi.

Charilam Assembly Constituency nung Tipra Motha indang lokti sentong ka nung o jembidang "tangbo onoki election magidang tesentaktep mayutsü, political party temi tezüluba nung nangzüksüla" ta Pradyot-i ashi.

"Tanga party-i tezüluba nung nangzükra onoki parnok den jembitsü saka tezüluba magütsüra onoki Opposition nung dang amentsü. 2018 küm IPFT-i aibelenba ama onoki masütsü" ta paisa metetdaksü.

2018 election mapang BJP-i nangzükra aika meinyaker, ta

Pradyot-isa ashi.

"Delhi nungi lennirtem arur terenlok bener arutsü, MNREGA sen atutsü aser tanga mapa aika inyaksü nangzükr aser item ya 2018 nung parnoki nangzükr. Küm pungu süiaka BJP-i kecha meinyak. Lennirtem tesüiba küm pungu tsüingda mangu aser tang parnok arur tenangzükra tulu agir" ta paisa BJP aija jemb.

"CPIM, Congress aser BJP-i parnok den lokteptsü atema rongshi saka ni memulung kechiyong ni ibaji Tiprasa nungner atema meinyaknür. Ni ozü nübertem senzüka meyütsünür aser tezüluba nung tenangzükra aginür. IPFT-i nübertem ashioktsüba ama ni meinyaknür. Parnok kü nem mapa aser tashi agütsütsü ta

bilem anungji ni election nung

metokteptsü lemtet aser ozü Tiprasa atema nüboyimtsütsü. Nisung shingaia Pradyot Manikya alizüksü makok" ta Tipra Motha chairman-isa metetdaksü.

Onoki miim tangatettep mesüra teloktep kecha melii menden 42 nung takok angutsü, ta paisa ashi.

"Onok indang politics ya shinga anema masü, onoki constitutional solution, shisaliok, terenlok atema dang noktaker. Ajisüiaka parnok politics ji Hindu-Muslim, India-China amala lir. Tripura nungneri küm pungu tsüingda parnok dang nungi kecha mangu. BJP-i nübertem ashioktsü. Mevar Kumar Jamatia-i ken o kar jembiba atema BJP-i pa minister menden nungi agiena liasü" ta Pradyot-isa metetdaksü.

Assam Rifles-i Manipur nung SOREPA telungpur ka apu



Imphal, February 5, 2023

(Agencies): Assam Rifles sepaitemi February 5, 2023 nü Manipur nung SOREPA züingsem ka apu.

Assam Rifles indang Keithelmanbi Battalion sepaitemi police den külemi Imphal district kübok Ahallup Thongkhong nung mita aodang

telungpur apu.

Külen, Assam Rifles sepaitemi Champhai Police den külemi mita aodang gari ka nung Rs 59 lakh alang heroin gram 119 apu.

Champhai district kübok Mulakawi yimtsüng anasa garitem mita aodang parnoki heroin apu.

Mozüji Vanlalchama ta ser nisung ka ket nung bena lia apu. Iba nisung ya Khamrang nungner lir aser Zokhathar nungi Champhai tashi senzüba gari driver lir.

Meghalaya nung TMC candidate 18-i nomination süogo

Shillong, February 5, 2023

(Agencies): Meghalaya Assembly elections atema Trinamool Congress candidate 18-i nomination file süogo.

Honibarnü nomination file asürtem:

George B Lyngdoh (Umroi), Richard M Marak (South Tura), Miani D Shira (Ampati), Lasting Suchiang (Mowkaiaw), Gilbert Laloo (Myllem), Sengkhal A Sangma (Dalü), Fernandez Dkhar (Rambrai-Jyrngam), Dondor Marbaniang

(Mawkynew), Macmillan Kharbani (Nongstoin), Lazarus Sangma (Chokpot), Elgiva Gwyneth Rynjah (North Shillong), Saljaringrang Marak (Baghmara), Rajesh M Marak (Rongara-Siju), Dr. Saralin Dorphan (Mawhati), Gilbert Nongrum (Umsning), Sunmoon D Marak (Jirang), Longsing Bey (Nongpoh) aser Vincent Sangma (Mawsynram).

"TMC lennirtem ama onoki sorkar ketdangsubaren shitak agütsünür. Ri-Bhoi district nung

candidate pungui nübor temetentem atema noktaker. Taruba küm pungu nung nübertem asoshi mapa inyaksürtem shimdaksünür" ta Umroi MLA George B Lyngdoh-i ashi.

"Onok külemi nübertem asoshi inyaksü kechiyong parnok MDA sorkar kübok timtemogo. Onoki nisung ajak atema inyaksü, MDA sorkari senzüka yutsür ajak atema inyaksü" ta Ampati candidate Miani D Shira-ia ashi.



Congress-i Tripura assembly election atema election manifesto sayaba sentong nung agiba noksa angur. Tripura nung alirtem khuret balala nung ajemdaker Congress-i election manifesto sayar aser state nungi BJP atsüngdoksü ta Congress MLA aser taoba Minister Sudip Roy Barman-i ashi. Congress indang Tripura election manifesto nung tongtipang tenangzükra 20 agia lir aser item rongnung law & order, tetsürtem anema tashiyim inyakerter merenshitsu, Lokayukta tashitaitba akümtsü, sensaker nem angati medical treatment, BPL kibongtem nungi tetsür kiyimdang Rs 50000 agütsütsü, tetsür kaketshirtem Post Graduate tashi angati züingdaksütsü aser mozü shibelener tetsüditem anema mapa inyaksüba onüktem lir. (Agartala, February 5)

### YIMNASANGER TSÜNGTA AKANG-ALONGTEP OLA



Akhi tsürabur mapang nungi Longkhum aser Longkong Yimnasanger tsüngta Aksü süngojem magiteti aruba tsürabur sobaliba ama yimnasanger tsüngda 3rd February, 2023 anogo Longkong Unger Salang nung Aksü süngojem tajung ka-a tang aser lanu putu temoatsü nung jungshitepa libalirua aotsü obang medema mensem tajung menogo.

Aser yimnasanger Arogo Sannüker aser Laishirtemi anir yimti ana Putu tatartem medema Longkong Baptist Arogo temeshi tenla kidang temoatsü meshia sarasdem sentong tajung agia temoatsü tulu nguogo ta ayimoktsür.

Sd/-  
**M. Lepden Jamir**  
Chairman/Aola  
Longkong Village Council

Sd/-  
**C. Angang Jamir**  
Chairman  
Longkhum Village Council

### SÜR KÜM KA AJUNGBA ANOGO BILEMTETER

Asür Nungsangtemjen  
Asüba Anogo: Feb 6, 2022



Temeim Oba, Pongmang ka ama temenungratsüka ajungbena nai onok doktsür tanü küm ka abensar saka onoki nü mapa tajung temeim toh kodanga amatsü makok. Na ali ama onoki na menungra belemteta sarasadema amonger.

*Temeim kinungtsü, chirnur, semchir aser anükako*

### Taoba Pakistan tir Pervez Musharraf süogo



küm pa malidang tasüba temerenshi agütsütsü obendang agüja liasü. Iba obendang ya mapang tatsüka lir melenshiaka pa kodanga Pakistan-i meyiba maru.

Item tatalokba liaka taoba mapang Musharraf den yariteper aser tang taoba ato kilonser Imran Khan'er party nung lenir Fawad Chaudhury-i Musharraf tenüng tushia liasü.

"Pa dang military dictator ta aja, saka pa kübok aliba democratic system dang tashi taitba meliasü... Pervez Musharraf-i tensa tamajungba mapang Pakistan ania liasü, aser Pakistan nungeri pa yimsüsüba mapang ya Pakistan puti otsü nung tajungtiba liasü ta amanger," ta Chaudhury-i sangdong ka nung ashi.

Ajisüaka Islamabad nung amenoka aliba tentet, Tabadlab indang CEO, Mosharraf Zaidi-i ashiba agi, pa yimsüsüba mapang Pakistan raksaba ya Musharraf mapa lir.

Linük indang mitkar lenir ka ama tenzükdang India den Kargil rara 1999 küm May ita tenzük aser iba mapang Pakistan nunger mitkar lenirtemi miima India tsütsü Kargil ya rakzüksü asoshi operation tenzüksü ozüng agüja liasü, anungji India nung alir aikati pa ya tsükchir ka ama züngshi.

Saka taoba mapang UN diplomat aser Congress lenir Shashi Tharoor-i "Mapang ka India asoshi tsükchir tamajung ka liasü saka 2002-2007 yimjung atema tashi tulutiba akum," ta shia liasü.

Taoba mapang mitkar lenir inyaka alisang Musharraf ya amyloidosis agi shiranga liasü, aser iba tashidak yagi temang nung tenük-telen raksatsür. Pa ya mapang talangka yipten nungi mesakteti wheelchair nung liasü.

Musharraf ya kinungtsü Sehba aser tanur ana yutsür asü.

**Islamabad, Tsüklai/February 05 (Agencies):** Taoba Pakistan tir General Pervez Musharraf, shibai mitkar tashi amshia 1999 nung sorkar atsüngdok, pa arishi küm 79 nung süogo.

Pa ya Pakistan tir ka ama 2001 aser 2008 tsüngta inyaka liasü aser mapang talangka shiranga arur Dubai nung asü, ta linük mitkar indang sangdong ka nung ashi.

Pa aiben tepsettsü merangba nungi jenbu aser Islamist telungpur aser West tsüngta timtem adokba nunga yakpang sür liasü.

Linük nung anema nokdakaka pai 9/11 lendong sülen US-i kiralongrar anema raraba nung bukuma liasü.

2008 election nung pai tamakok ajuru aser ita trok lir linük toktsür ainshia liasü.

Pa 2013 küm election nung tokteptsü asoshi meranga linüki meyipa shilang saka pa apu aser election nung metokteptsü tenokdangba agütsü. Pai ashikülak mapa tulu inyak ta ken o benok aser pa meliaka tasüba agi merenshitsu obendang agütsü, saka ita ka majungdang iba telemtetba ya melenshia liasü.

Pa temang anepalutsü asoshi Pakistan nungi 2016 küm Dubai-i ao aser iba sülen bendang lima nung lia arua liasü.

Musharraf ya Deobarnep

mozü kidang asü. Pa tasümag ya United Arab Emirates nungi Pakistan-i tayimtsü ka nung bener aotsü aser aji masüdag par kinunger temi iba mapa inyaksü tezüluba nung agütsütsü, ta osang ka ajanga ashi.

Pakistan mitkar temi sangdong ka nung asükhü lemsatop aser "Allah-i asür tanüla moajang aser mangyimer kibong nem tashi agüjang," ta shia liasü.

Pakistan Tir Arif Alvi-ia asür tanüla teti tatem makai anisüngzüksü aser mangyimer kibong temolung ulutsü sarasademtsü.

Pakistan Ato Kilonser Shehbaz Sharif-ia asükhü lemsatop aser linük indang mitkar lenirtemia yamaji asükhü lemsatopa liasü.

Musharraf-i yimsü asüba mapang mapa tulu aser tesashia jenti inyakogo. Pa leir ka ama asüdag linük indang rongsenketzüng tajungba kumdahtsüba asoshia tushia liasü.

Pa yimten tashi samaba sülen ken o balala agi melangbanger liasü aser item rongnung taoba Pakistan Ato Kilonser Benazir Bhutto nem security peria magütsüba indanga tai tonglokja liasü, shiba 2007 küm Taliban-i tepseta Pakistan aser alima aoksatsü.

Aser pa wadang ya maksü nung tembanga apu aser 2019

### SANGDONGER

Ni Shri. Subongwati, 23 Angetyongpang A/C nungi taoba candidate (2008 BJP & 2018 NCP) ajanga Honourable Chief Minister Shri. Neiphiu Rio den February 4, 2023 nü ajuru aser pa lenisüba tashi itshidaktsütsü atema aser ano aruya aliba 14th Nagaland Legislative Assembly 2023 nung Shri. Tongpang Ozukum tashi agi yaritsü sangdonger.



### SANGDONGER

Ni Shri S. Chuba Longkumer, 24th Angetyongpang A/C nungi taoba candidate, NPF party indang primary aser active membership nungi anentsü lemteter. Anungji ni Chief Minister Neiphiu Rio aser NDPP tir Chingwang Konyak lenisüba kübok NDPP party nung adener. Maneni ni party indang Advisory Board nung züngsem ka ama shimogo.

### Chile morok mi nung nisung 23 shi süogo

**Santiago, Tsüklai/February 05 (Agencies):**

Chile nung tesem ter dak tema nung morok mi adokba ajanga Honibarnü sorkari ano region danga ka nung emergency sangdong, kong meyi tatsük ajanga iba mi aziüoktsü merangba nung timtem tali ang agütsür aser tang tashinung nisung 23 takum samaogo.

Iba morok mi nung nisung 979 yiruogo, ta ketdangsür temi Honibarnü osangbener dang ashi.

Tang tesüsa emergency sangdongba yagi southern tsütsü La Araucania awajemer, koba taoba mapang sangdonga aliba Biobio aser Nuble region anasa lir.

Interior Minister Carolina

Toha ajanga Chile yimtiba Santiago nung osangbenerten jembiba mapang ashiba agi, tsüngsangmopung kanga majungba agi mi jangrua aliba remseptsü kanga tasak aser tensa tamajungba akümer, ta shia liasü. "Rongjen rongya oyaa aliba mi lenmang ji meyipdahtsütsü nüngdak" ta lai sa shisem aser Hokulbarnü ano tesem 76 tashi nung mi adoksemba shia liasü.

Ketdangsür temi ashiba agi, anüolentip Hemisphere nung meyi tatsük 104 degrees Fahrenheit(40° Celsius) alema atuba ajanga Hokulbarnü ano tesem 16 nung mi tasen jangruadok.

(Maneni tapak 8 nung...)

## Khelo India: Haryana Medal tally nung temaba jenjangi tuogo



**Tsüklai/February 5, 2023**

**(Agencies):** Khelo India Youth Games 2022 Madhya Pradesh (KIYG2022MP) tenzüker anogo trokbuba nü boxing nung gold medal tenet anguba sülen medal tally nung defending champions Haryana temaba jenjangi tuogo.

Honibarnü parnoki gold medal 10 anguba den Javelin thrower Deepika-i T.T. Nagar stadium nung tetsür tetoktepba nung nü meter 55.19 tsüteta national youth record tasen ka yangluogo.

Haryana nungisa Dev Kumar Meena-ia Hokolbarnü track and field events tenzüka anogo tebur Pole Vault nung national youth record tasen ka yanglua liasü. Medal tally nung

Maharashtra tanabuba aser Madhya Pradesh (M.P) tasembuba jenjang nung lir.

Boxing asaya ya T.T. Nagar stadium nung asaya aser Haryana team-i gold medal angutsü maongka 20 aliba nungi tenet tashi angu aser iba den tanga medal-a ngua liasü.

Parnoki Boys weight category nung gold medal asem angu. Medal angurtem rongnung Sahil Chauhan (67-71kg), Deepak (71-75kg) aser Nitesh Malik (75-80kg) nung densema liasü.

Tanga category tem nung Manipur nungi Jadumani Singh-i 48-51kg flyweight category aser Chinglemba Moirangthem-i 60-63 kg Light Welterweight category nung

gold medal ngua liasü.

Boxing asaya nung Haryana tsürtemi tajungba asaya parnoki medal pezü ngua liasü aser kasa asaya nung Manipur tsür anati gold medal angu. Bhawana Sharma (45-48kg), Ravina (60-63kg), Priyanka (63-66kg) aser Muskan (70-75kg) nungeri Haryana atema gold medal angu.

Honibarnüsa Basketball, Track Cycling aser Gatka asaya tembangogo. Tebur Basketball asaya nung Rajasthan-i gold medal angu. Parnoki 90-85 agi Tamil Nadu madak takok ngua liasü.

Tetsür asaya Punjab team-i 73-56 agi Chhattisgarh team ayong ayonga koka liasü. Tetsür asaya nung M.P.-i bronze medal angu aser tebur asaya nung Chandigarh-i bronze medal ngua liasü.

Cycling nung Keirin Boys asaya nung Luv Kumar Yadav-i (Rajasthan) gold angu aser Keirin Girls discipline nung West Bengal nungi asayar Santi Biswas-i gold ngua liasü.

Gatka asaya nung Punjab team-i gold medal pezü angutsü aliba nung asem ngua liasü.

## Zagreb Open: Wrestler Ashu-i bronze medal angu



**Tsüklai/February 5, 2023**

**(Agencies):** Deobarnü Zagreb Open Ranking Series tatembangbuba anogo Asian Championships bronze medallist Ashu-i Greco-Roman category nung 67kg asaya nung bronze medal nguogo.

Arishi küm 23 tain asayar yagi Lithuania nung asayar Adomas Grigaliunas 5-0 agi koka India asoshi tanabuba bronze medal ngua liasü. Under-23 world champion, freestyle wrestler Aman Sehrawat-i asayamung tenzüka anogo tebur 57kg asaya nung bronze ngur liasü.

Ashu, shiba qualification round nung 9-0 agi Iran nung asayar Reza Mahdi Abbasi tsükdakja liasü pai repechage bouts nung Hungary nung asayar Adam Pholec 8-0 agi akok aser iba sülen Norway nung asayar Haavard Joergensen 9-0 agi koka bronze medal round-i ai.

India nung asayar yagi asaya mezüngbuba shilem nung point asem angu aser tanabuba shilem asayaba mapang tetendangertemi pa nem takok agüja liasü.

India nung rongnungi Greco-Roman wrestler Sagar, 63kg repechage bout nung Austria nung asayar Aker Schmid Al Obaidi-i tsükdakja liasü.

Deobarnü tanga asaya ka nung Birmingham Commonwealth Games silver medallist Samantha Stewart-i, tetsür 53kg quarter-final asaya nung India tsür Asian Championships bronze medallist Sushma Shokeen tsükdaktsü.

Sushma-i France tsür Tetiana Profatilova aser China tsür Yuhong Zhong na koka quarter atong.

Maneni India nung atema tezüdangtsüka 72kg wrestler Reetika-a semi-finals metongtet aser Kiran-i (76kg) tsükatok.

## WPL atema Mumbai Indians-i Jhulan Goswami anisemogo



**Mumbai. Tsüklai/February 5**

**(Agencies):** Taruba Women's Premier League (WPL) atema Mumbai Indians-i, team mentor aser bowling coach asütsü atema taoba India tetsür team nungi nungtugu pace bowler Jhulan Goswami shimba metetdaksüogo.

Taoba England team captain Charlotte Edwards, team head coach asütsü aser taoba India tetsür team nungi all-rounder Devieka Palshikaar batting coach aser Trupti Chandgadkar Bhattacharya team manager asütsü shimogo.

Goswami ya iba asayaba asayaba bowler tem ajak rongnungi tajungtiba ka ta

züngshir. La küm 20 shi asayaba mapang lai international wicket 350 agia lir. Tetsür ODI asaya nung tang tashi nung lai wicket timba agia record bena lir aser Tetsür World Cup nunga pai wicket timba agia lir.

Goswami ya 2016 küm January ita ICC Women's ODI bowling rankings nung temaba jenjangi atu aser la asaya nungi anenba sülen Bengal women's team mentor ama inyaka lanurtem arantetshitsüba nung shilem agia liasü.

Kasa mapang nung Edwards ya tetsür cricket asaya nung ajak dang tajungtiba ka ta züngshir. La küm 20 shi asayaogo aser iba mapang la

lenisüba nung England team-i ODI aser T20I World Cup kokogo.

MI team kibur Nita M Ambani-i, "ni Charlotte Edwards, Jhulan Goswami aser Devieka Palshikaar nung MI #OneFamily-i pelashishia agizüker. Asaya nung tetsür timbai shilem agiba aser asayar ama dang masü saka coach, administrators, aser support staff ama takok tajung nguyonga aoba ngua kanga pelar. India nung tetsür saisapong atema tang ya mapang tajung ka lir," ta ashi.

"Tetsür asayartemi international jenjang nung linük atema konang tetushi bener arutsüdar. Saisapong tashi ajanga tepela prokshiba mapang tetsürtem nem tashi tali agüjang aser iba ajanga lanu putu ajungmesoang. Temaba jenjang tongtettsü atema takokba tashi parnok nem teyari agütsütsü onok bendanga agütsür lir," ta laisa ashi.

Lar team coach team indang jembiba mapang Ambani-i, "head coach Charlotte aser la den bowling coach aser mentor Jhulan aser batting coach Devieka nung lenisüba nung onok tetsürtemi takok tajung nguyonga aotsü imla atar. Coach tem aser team ajunga den kanga junga sendaktepa inyaksü yongya atar," ta ashi.

## Chile morok mi nung nisung...

(Tapak 7 nungi...)

Dang emergency ozüng kübok aliba tesem asem ya nisung kangabo meliaka tangaleni export asüba süngjanglijang, apple, berries aser grapes aika züsentetba aluyimba tesemtem aser arem agi meyipanga aliba tesem tulu lir.

Ketdangsur temi osangbener dang ashiba agi Spain, United States, Argentina, Ecuador, Brazil aser Venezuela sorkar temi tayimtsü aser mi den rarar nisung dena teyari aika agütsüdar.

Ano Honibarnü La Araucania nung emergency-support helicopter ka tsükoka yangji aliba pilot aser mechanic taküm samaogo ta ketdangsur temi-sa shia liasü.

Mi lendong nung asür rongnungi nisung 11 bo Santiago anüolentip nungi mile 310 shi pilar Biobio nung aliba Santa Juana jila nungi lir ta ashi.

Tesüiba hapta nungi mokozi tulu alongba agi lenmang

nokdanga lir anungji helicopter ajanga mi remsepdaktsütsü inoktsür. Mi den rarar nisungtem aser yimtsüng nüburtemi mi remsepdaktsütsü mokokteti raradar.

Iba emergency ozüng sangdongba ajanga sepaitem aser mi den raratsü asoshi nüngdakba osettem maneni agütsütsü.

Honibarnü ketdangsur temi asadanga agi, mi ajanga alinük hectare 40,000 (99,000 acres) shi rongdokogo, koba US yimti Philadelphia dang nungi tuluba shi lir.

National Forestry Agency CONAF osang ajanga ashiba agi Hokulbarnü tashi nung merokmi 231 nungi 151 bo azüoktetogo aser ano 80 den maneni raradar.

Ketdangsur temi ashiba agi merokmi noklang shilem nung 90 bo arem acres 12(5 hectares) dak tema rongma maodang remsepo.

## BILEMDANGANG

"Tetsübo malirtemi lendong aiben ajurur."